

UGOVOR ZA NABAVKU I ISPORUKU HIDRAULIČNOG ALATA ZA TEHNIČKE INTERVENCIJE

I UGOVORNE STRANE

1. **KANTONALNA UPRAVA CIVILNE ZAŠTITE KANTONA SARAJEVO**, ul. Fehima ef. Čurčića br. 1., 71000 Sarajevo, koju zastupa direktor, Dženan Brkanić, (u daljnjem tekstu: **Ugovorni organ**), ID broj: 4200665390008 i
2. **FIRING d.o.o.**, ul. Čajengradaska bb., 71300 Visoko, koju zastupa direktor, Nedžad Smajlović, (u daljnjem tekstu: **Dobavljač**), ID broj: 4218200320000.

U daljnjem tekstu Ugovora, kada se **Ugovorni organ** i **Dobavljač** navode zajednički, tj. zbirno, tada su označeni kao „**Ugovorne strane**“.

II OSNOV ZA ZAKLJUČENJE UGOVORA

Osnov za zaključenje ovog Ugovora je Odluka o izboru najpovoljnijeg ponuđača za nabavku roba, Ugovornog organa, broj: 06-11-781-9/24 od 13.09.2024. godine i ponuda Dobavljača, broj: 752/24 od 29.08.2024. godine.

III PREDMET UGOVORA

Član 1.

Predmet ovog Ugovora je nabavka i isporuka roba: "Hidraulični alat za tehničke intervencije", prema tehničkim specifikacijama, koje su navedene u Tenderskoj dokumentaciji za nabavku robe Ugovornog organa, broj: 06-11-781-2/24 od 09.08.2024. godine, kao i u ponudi Dobavljača, br. 752/24 od 29.08.2024. godine, koje čine sastavni dio ovog Ugovora.

Član 2.

Hidraulični alat za tehničke intervencije (u daljem tekstu: roba) iz člana 1. ovog Ugovora, Dobavljač je dužan isporučiti prema svojoj Ponudi, te prema uputstvima Ugovornog organa i u skladu sa važećim tehničkim propisima, pravilima i standardima.

IV CIJENA I NAČIN PLAĆANJA

Član 3.

Ukupna vrijednost ugovorene robe bez PDV-a definisane u članu 1. ovog Ugovora iznosi: 107.462,00 KM (slovima: stotinusedamhiljadačetiristotinešezdesetdvije KM).

PDV na ukupnu vrijednost ugovorene robe iz prethodnog stava ovog člana iznosi: 18.268,54 KM (slovima: osamnaesthiljadadvijestotinešezdesetosam i 54/100 KM).

Ukupna vrijednost ugovorene robe sa PDV-om iznosi 125.730,54 KM (slovima: stotinudvadesetpethiljadasedamstotinatrideset i 54/100 KM).

Cijena je fiksna i ne podliježe nikakvim promjenama za vrijeme trajanja Ugovora.

Član 4.

Ugovorne strane su saglasne da će Ugovorni organ ukupan iznos iz člana 3. ovog Ugovora isplatiti Dobavljaču po obostranom potpisivanju ugovora, a nakon isporuke, u roku od deset dana na račun Dobavljača broj: 1990470004025063 otvoren kod SPARKASSE banke.

U slučaju da se prilikom primopredaje robe, konstatuju nedostaci i odstupanja od tehničkih specifikacija datih u Ponudi br. 752/24 od 29.08.2024. godine, Ugovorni organ se obavezuje da će isplatu izvršiti odmah, a najkasnije u roku od 10 dana, nakon što Dobavljač otkloni nedostatke konstatovane u Zapisniku o primopredaji roba iz člana 9. ovog Ugovora.

V ROK I MJESTO ISPORUKE

Član 5.

Dobavljač se obavezuje da će robu iz člana 1. ovog Ugovora, isporučiti najkasnije u roku od 30 dana od dana potpisivanja Ugovora na adresu: ul. Fehima ef. Čurčića br. 1., 71000 Sarajevo.

Član 6.

Ugovoreni rok isporuke robe iz člana 5. ovog Ugovora, može se produžiti u slučaju:

- nastanka više sile ili drugih okolnosti koje Dobavljač nije mogao predvidjeti,
- kada ugovorne strane sporazumno produže ugovorni rok.

Pod višom silom se podrazumijeva slučaj kada ispunjenje obaveze postane nemoguće zbog vanrednih vanjskih događaja na koje Dobavljač nije mogao uticati, niti ih predvidjeti ili spriječiti.

Član 7.

Ugovoreni rok isporuke robe zbog nastanka više sile ili drugih okolnosti koje Dobavljač nije mogao predvidjeti može se produžiti i isti odobrava Ugovorni organ, s tim što je Dobavljač dužan da u roku od tri dana od nastanka više sile ili drugih okolnosti zbog koji ne može izvršiti svoje obaveze po ovom Ugovoru, obavijestiti Ugovorni organ.

Ukoliko Dobavljač svoje obaveze, zbog dejstva više sile ili nastanka nepredviđenih okolnosti, ne može ispuniti u roku iz prethodnog stava, Ugovorni organ ima pravo na raskid Ugovora.

VI KVALITET ROBE

Član 8.

Dobavljač se obavezuje da isporučena roba iz člana 1. ovog Ugovora, bude traženog kvaliteta i karakteristika, odnosno kvaliteta i karakteristika koji je dao u svojoj Ponudi, br. 752/24 od 29.08.2024. godine, a koju je Ugovorni organ odabrao kao najpovoljniju.

Kvalitet i karakteristika robe koja je predmet ovog Ugovora, kontrolisat će ovlašteni predstavnici Sporazumnih strana.

Primopredaju predmetne robe izvršit će ovlašteni predstavnici Sporazumnih strana.

O navedenoj primopredaji robe sačinut će se Zapisnik o primopredaji, odmah, a najkasnije u roku od 24 sata, od prijema robe, koji će potpisati ovlašteni predstavnici Sporazumnih strana.

Član 9.

Sva eventualna odstupanja i nedostaci, prilikom primopredaje robe, konstatovat će se Zapisnikom o primopredaji robe.

Dobavljač se obavezuje da će primjedbe konstatovane Zapisnikom o primopredaji otkloniti, o svom trošku, odmah, a najkasnije u roku od 7 dana, od dana potpisivanja navedenog Zapisnika. Ako u navedenom roku Dobavljač ne otkloni primjedbe konstatovane Zapisnikom o primopredaji robe, Ugovorni organ zadržava pravo da raskine Ugovor.

VII OBAVEZE UGOVORNIH STRANA

Član 10.

Dobavljač se obavezuje:

- da će dostaviti garanciju za uredno izvršenje ugovora u obliku безусловne/bankarske garancije u roku od deset dana od dana zaključivanja/obostranog potpisivanja Ugovora u iznosu od 10% od ukupne vrijednosti ugovorene robe bez PDV-a iz člana 3. ovog Ugovora, koji se naplaćuje ukoliko Dobavljač ne izvrši svoje obaveze po ovom Ugovoru ili neuredno izvrši iste;
- da će ugovorne obaveze izvršiti blagovremeno, u ugovorenom roku, stručno i kvalitetno u skladu sa važećim tehničkim normativima i standardima, sve prema dostavljenoj Ponudi;
- da će u najkraćem roku otkloniti eventualne nedostatke koji mu budu predloženi prilikom primopredaje robe iz člana 1. ovog Ugovora od strane ovlaštenog lica Dobavljača;
- da će obezbijediti servisnu podršku u garantnom periodu, u roku od maksimalno 48 sati po pozivu korisnika robe;
- da će izvršiti obuku za korištenje predmetne robe svih korisnika;
- da će prilikom primopredaje robe iz člana 1. ovog Ugovora, Ugovornom organu predati svu potrebnu prateću dokumentaciju za istu i to: garantne listove za ponuđenu robu iz tehničke specifikacije, uputstvo za upotrebu na jednom o službenih jezika u Bosni i Hercegovini i drugu tehničku dokumentaciju.

Član 11.

Ugovorni organ se obavezuje:

- da će izvršiti uplatu ukupne cijene vrijednosti ugovorene robe, na način i u roku utvrđenom u članu 4. ovog Ugovora;
- da će pismeno obavijestiti Dobavljača o svakom eventualnom propustu u odnosu na pitanja utvrđena ovim Ugovorom.

VIII GARANTNI ROK, UGOVORNA KAZNA I RASKID UGOVORA

Član 12.

Za isporučenu robu važi garancija proizvođača robe u trajanju minimalno jedne godine, s tim što je Dobavljač dužan da svu dokumentaciju o garanciji proizvođača robe, pribavi i preda Ugovornom organu. Garantni rok teče od dana kompletne isporuke robe.

Član 13.

Ukoliko Dobavljač ne izvrši svoje obaveze u ugovorenom roku, dužan je da, Ugovorni organ za svaki započeti dan zakašnjenja plati ugovornu kaznu u iznosu od 0,1% od ukupne vrijednosti ugovora bez PDV-a.

Ukupna vrijednost ugovorne kazne koja se plaća ne može iznositi više od 10% od ukupne vrijednosti Ugovora.

Član 14.

Ukoliko isporuka ne bude u ugovorenom roku iz člana 5. ovog Ugovora ili u dodatno dogovorenom roku iz člana 7. ovog Ugovora, Ugovorni organ zadržava pravo jednostranog raskida Ugovora.

IX PRELAZNE I ZAVRŠNE ODREDBE

Član 15.

Dobavljač nema pravo zapošljavati, u svrhu izvršenja ovog ugovora, fizička ili pravna lica koja su učestvovala u pripremi tenderske dokumentacije ili su bila u svojstvu člana ili stručnog lica koje je angažirala Komisija za nabavke, najmanje šest mjeseci po zaključenju ugovora, odnosno od početka realizacije ugovora.

Član 16.

Na sva pitanja koja nisu regulisana ovim Ugovorom, a pojave se prilikom njegove realizacije primjenjivat će se odgovarajuće odredbe Zakona o obligacionim odnosima.

Član 17.

Ugovorne strane su saglasne da će sve nesuglasice i sporove, koji eventualno mogu da proisteknu iz ovog Ugovora, prvenstveno nastojati riješiti sporazumno, a ukoliko to nije moguće, nadležan je Općinski sud u Sarajevu.

Član 18.



Ovaj Ugovor stupa na snagu danom njegovog potpisivanja od strane ovlaštenih predstavnika Sporazumnih strana.

Član 19.

Ugovor je sačinjen u 6 (šest) istovjetnih primjerka, od kojih svaka od Sporazumnih strana zadržava po 3 (tri) potpisana i ovjerena primjerka.



DOBAVLJAČ
FIRING d.o.o.
DIREKTOR

Nedžad Spajčević


M.P. 
Broj: *065/24*
U, *Sarajevo*, *16.10* 2024 godine.

UGOVORNI ORGAN
KUCZ KS
DIREKTOR

Željko Brkanić


M.P. 
Broj: *065/24*
Sarajevo, *11.10* 2024 godine.